

Date – 11/10/2024

Time - 7:30 -7:40Hrs

- Governor Dr. Hari Babu Kambhampati an Mizoram chhunga Border Road Organisation (BRO) hmalakna leh hmachhawpte sawipui.
- NGO Coordination Committee chuan tuialhtheih man tihsan chungchang ennawn tura Cabinet thutkhawm hma chu –tuialhthei man tihsan chu tihtawp rih tur a ni ang tih Chief Minister in a hrilh an ti.
- PWD Minister Pu Vanlalhlalan a office chamber-ah Mizorama kawng chhia chungchang official te leh kawng siamtute a sawipui.
- Prime Minister Narendra Modia chuan India Act Eat Policy chuan ASEAN ramte nena inlaichinnaah chakna thar leh kawng thar a pe a ti.

<><><>

GOVERNOR

Project Pushpak Chief Engineer Pu Girish Prasad Singh chuan nimin khan Governor Dr. Hari Babu Kambhampati chu hmuin Mizoram chhunga Border Road Organisation (BRO) hnuaia hmalakna leh hmachhawpte a hrilhfiah. He meeting hi Mizoram hmun kilkhawr leh pawimawh tak takte thleng thei tura tun dinhmuna BRO kaltlanga kawngpui leh lei dawh mek thlen chinte inhrilhhriatna atana duan a ni.

Governor chuan ramri depa awm Mizoram chhunga BRO hmalakna zinga hmasawna ruhrel pawimawh tak, kawngpui sial hna thawhte chu hun pawt rei lo thei ang bera zawhfel a tul thu sawiin, Mizoram hmunhna chu India ram hmun dangte nena a inang loh avangin hmalak dan pawh dinhmunte thlir thiam chunga kalpui thiam a tul hle a ni, a ti a. BRO kawng siam, cheithat leh enkawl zui kawngah theihtawp chhuah turin Project Pushpak CE leh a thawhpuite a chah a ni.

Governor chuan Pushpak-in Mizoram tana project pawimawh tak tak an siam leh an thawk thin chu lawmawm tiin, tawiawm a inhuam thu a sawi a. Thawhhona tha hnuaiah project-te zawhfel thuai a nih a beisei thu sawiin, hei hian ramri dep State chawikan leh tihhmasawna kawnga hmalaknaah Mizoram chu rinluh a nih dawn thu a sawi baw.

He hunah hian Pushpak Chief Engineer chuan BRO hmalakna kaltlanga kawngpui thar bakah kawng awmsa, District leh ramri dep pawhtu kawngpui thawmthat kawnga hmalaknate tarlangin, tunlai thiamna nena tangkawpa kum tluana hman theih tur kawngpui tha zawk siam nana ruahmannate, inkalpawhna changtlung zawk, ram sum leh pai tihhmasawna leh eizawna siam thei tur tinzawna project an ruahman thin thu a sawi a. Road project-te chu armed force veivahna tinzawn ngawr ngawr ni lo, sundawna, tourism leh hmasawna dang dang atana duan a nih thu a sawi.

<><><>

RTI WEEK

Vawiin hian Mizoram pumah RTI Week hman tan a ni dawn a, Aizawlah chuan ATI Auditorium hman a ni ang.

Akashvani palaiin a kawmna ah Mizoram Chief Information Commissioner Pu John Neihlaia chuan, kum 2006 June ni 29 atanga kumin October ni 1 thleng khan RTI zawhna sing 3 chuang a lut tawh tih a sawi a. CIC chuan kum 18 chhungin RTI zawhna lut zawng zawng hi 35,080 ani a ti a, Kum 2022 July thla atangin mobile phone leh computer hmanga zawh theihna RTI Online hawn thar niin, online hman atang hian zawhna a letin a lut tam zawk tih a sawi.

Pu John Neihlaia sawi danin RTI week pualin kuminah Mizoram hmun hrang hranga hun hman ani a, October ni 5 atanga ni 12 chhungin ramchhung hmun dang rualin hman a ni a, District tina Bawrsap te kaihhruaiin a remchan danin RTI Week hman ani thin tih sawiin kuminah RTI Week hmang vek turin hriattirna pek a ni a ti a, RTI Week hmanna pui ber chu Aizawl ah naktuk zing dar 11 ah ATI Auditorium ah hman a ni dawn a ti bawk.

<><><>

PROTEST AGAINST FUEL PRICE HIKE

Mizorama NGO hrang hrang intelkhawmna NGO Coordination Committee chuan tuialhtheih man tihsan chungchang ennawn tura Cabinet thutkhawm hma chu –tuialhtheih man tihsan chu tihtawp rih tur a ni ang tih Chief Minister in a hrilh an ti. NGOCC leh Mizoram Commercial Vehicle Union (MCVU) te hi nimin khan Central YMA Committee Room ah an inkawm a, NGOCC Chairman Pu Lalhmachhuana, Central YMA President kaihhruaiiah hian tunhnaia Sawrkarin Oil man a tihsan chungchang leh a kaihhnawih te, Mizoram Commercial Vehicle Union in karleh ni 14 atanga Oil man san leh kawng chhia avanga tlan loh an tum chungchang te sawiho a ni a.

Tunkar thawhlehnia Chief Minister an hmuh naah Chieg Minister chuan Oil man tih to chungchang hi Cabinet meeting thurel a nih avangin Cabinet meeting bawkin a ngaihtuah leh a ngaih thu leh Cabinet meeting koh thuai a nih tur thu a sawi a, chumi chhung chuan hman rih loh- kept in abeyance a nih tur thu a lo hrilh niin NGOCC hruaitute chuan an sawi a. MCVU hruaitute chuan inrinni ral hma in Sawrkarin tawngka ngeiin a hmalak tum dan hrilhfiah se an ti tih an sawi a, hei bakah hian NGOCC hruaituten Sawrkar leh MCVU hruaitute inkawm dan tur ruahmanna lo siam se an ti.

Hetihlai hian Petrol leh Diesel man tihsan duh loh lantirna hi Aizawl City Bus Owners Assn chuan an thlawp thu an sawi a, karleh thawhtanni atanga Mizoram Commercial Vehicle Union in lungawilohna an lantir hunah an pawl huap chin city bus zawng zawng an ding ve dawn tih thuchhuah siamin an sawi a ni.

Mizoram Merchant Assn (MIMA), Gen Hqrs. chuan NGO Co-ordination Committee leh Mizoram Commercial Vehicle Union) ten Mizorama Oil man tih to chu ti hniam leh tura Sorkar an nawrna chu awm a tihpui a, an thlawp tih an sawi a, Mizoram hi India ram kilkhawr, Myanmar ram hrula awmin, tlang ram, kawng tha bawk si lova awm a ni a. Mizorama bungraw phurh man hi State dang aiin a sangsa tawh a. Tun anga oil man tih san a nih chuan bungraw phurh man a sang anga dawn lo a,

Bungraw phurh man a san chuan bungraw man pawh a sang chhova, hei hi sumdawngte mai bakah, mipuiin an tuar dawn a ni, an ti.

<><><>

CM

Chief Minister Pu Lalduhoma kaihhruaiin Centre for Environment & Social Justice hotute leh Taxation Department hotuten meeting an nei a. Chhiah thar siam chuang lova sawrkar sum leh pai dinhmun tha zawk a awm theih nana chhiah lak khawm tihpun dan tur inrawnkhawmna an nei.

He meetingah hian, state pawn atanga Mizorama sumdawng bungrua lo lut, GST pe si lo te dap chhuah leh fel fai zawka umzui dan tur te, Mizoram chhunga sumdawna kalpui, GST pe ngei tura ngaih, pe si lo an tam ni a lang te, GST hi bungruaah chauh ni lova Services ah pawh lak tur a nih thu leh; services sector atanga chhiah pe lo an tam si nia a lan thu te bakah chhiah lama Mizoram hmasawmna tur thil dangte an sawi a. Hma lak zui dan tur ruahmanna te pawh an duang a ni.

Meeting ah hian Pu TBC Lalvenchunga, Adviser to CM leh official pawimawh te an tel a ni.



PWD MINISTER

PWD Minister Pu Vanlalhlana chuan a office chamber-ah Mizorama kawng chhiar chungchang official te leh kawng siamtute a sawipui a,

He hunah hian Mizoram PWD hotute, National Highway & Infrastructural Development Corporation Limited (NHIDCL) Regional Office; Aizawl Executive Director te bakah Lok Sabha MP, Pu Richard Vanlalhmngaiha leh Lunglei West bialtu MLA, Pu T.Lalhlimpuia te an tel a ni.

Pu Vanlalhlana chuan fur laiin Mizoram mipui ten kawng chhiat avangin harsatna an tawk thin a, a bik takin mipui chakkhai lakna kawng ber Aizawl-Silchar kawng chhiat avanga harsatna tunhnaia thleng chu sutkian ran a ngai a ti a, he harsatna sukiang tur hian tha thlah lova, theitawp chhuah chhunzawm zel ni se, chumi tan chuan a tulna piangah PWD leh NHIDCL te pawh inrawn tawnin, inpuitawn thin turin a ngen a ni.

Meeting-ah hian Pu Vivendra Jokhar chuan NHIDCL in Mizoram chhunga an hnathawh tawh chin leh an hmabak te report pein, Aizawl -Tuipang kawng chu zaa 90 an thawhzawh tawh thu sawiin, an la thawhlohna hmun tlem te awm pawh, NHIDCL kutah ram hlan a nih loh vang a ni a ti a. Kumin June thla atang khan ram chu NHIDCL kutah a awm vek tawh a, an hmabak chu an thawh chhunzawm leh theih tawh ang, a ti. Aizawl-Silchar Road-ah pawh ngawrh taka hnathawh mek zel a ni a, nakum March thla ral hmain re-surfacing pawh zawh hman tum a ni, a ti.



WATER BELL

School Education Department chuan zirna in hrang hranga zirlai naupangin an tui mamawh chanve tal zirna inah an in theihna turin ‘Tui in Dar’ (Water Bell) vawi 2 aia tlem lo vaw theuh turin thupek a chhuah.

School Education Department thuchhuah tarlan danin Education Minister Dr Vanlalhlana hova Department hotute thukhawm chuan zirlai naupangte hriselna atan “Tui In” chu chin thanah an neih theihna turin hmalak an rel a, hei vang hian School Education Department hnuai zirna in hrang hrang ten Tui In Dar vua in naupang zawng zawng ten tui an in thin tur ani tiin thu a chhuah a ni.

Department sawi danin tui mamawh zat chungchangah mithiamte rawn an ni a, Elementary school (Primary leh Middle School) naupangte chuan nitin tui litre 1 leh chanve an mamawh anga ngaih a ni a, High School leh Higher Secondary School naupangte chuan nitin tui litre 2 leh chanve vel an mamawha ngaih a ni bawk.

School Education Department Director Pu Lalsangliana chuan dar vuak hunbi chu zirna in tinah mahnia ruahmanna siam tur a ni a ti.



PM IN LAOS

Prime Minister Narendra Modia chuan India Act Eat Policy chuan ASEAN ramte nena inlaichinnaah chak thar leh kawng thar a pe a ti. Nimina India-ASEAN Summit, Vientiane, Lao PDR a neihah he thu hi sawiin Pu Modia chuan kum zabi 21 chu India leh ASEAN ramte hun a ni a ti a. Remna chawisangtu ram leh ramdangte zalenna leh thuneihna zahsaktute an ni a ti bawk.

Puan tawh angina Prime Minister Narendra Modia hian nimin khan ni hnih cham turin Laos a thleng. Vientiane khawpuiah Laos Home Minister Vilayvong Bouddakham chuan a lo hmuak a ni.

PM Modia zin hian India leh ASEAN ramte inlaichinnaah nghawng tha tak a neih beisei a ni a. A zinchhuah hmaa a thuchhuah siamah Pu Modia chuan India Act East Policy pawimawhna hrang hrang a tarlang a. ASEAN ram hruaitute nen an thawhchonain hma a sawn zel dan leh hun lo kal tura hmachhawp awmte an ngaihtuah ho tur thu a sawi a. Indo-pacific chhehvelah remna, muanna leh hausakna a awm theih nan harsatna awm thinte an sawiho ang a ti bawk.



HIZB-UT-TAHRIR

Sawrkar laipui chuan Unlawful Activities (Prevention) Act hnuaiiah Hizb-Ut-Tahrir te chu firfiak pawlah a puang. Nimina thuchhuah a siamah Union Home Ministry chuan Hizb-Ut-Tahrir te chu ramchhunga thalai tamtakte firfiaka chetna lamah thlemin firfiak pawlah tam tak an dahlut an ti a. Heng zingah hian ISIS te pawh an tel a ti a. Hei bakah hian sum hmanga firfiakte tanpuina kawngah pawh an inhnamhnawih nia puh a ni bawk. Hizb-Ut-Tahrir te chuan social media hmang tangkaiin firfiaka chetna an vawrhdarh nasa hle niin Union Home Ministry chuan a tarlang a. Khawvelah Islam lalram din a, India pawh Islam-te thuhnuaia dah an tum a ni a ti bawk.

